

DOMENIE IV DI PASCHE

Antifone di jentrade cf. Sal 32,5-6

Dal boncûr dal Signôr e je incolme la tiere;
cu la sô peraule a son stâts fats i cîi, aleluia.

Si dîs Glorie a Diu.

Colete

Diu onipotent e eterni,
meninus a spartî la gjonde dal cîl,
par che l'umil trop dai fedêi al rivi
là che lu à precedût la fuarce dal pastôr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 13,14.43-52

Nô o lin dai paians.

Dai Ats dai Apuestui

In chei dîs, Pauli e Barnabe, partint di Pergje, a rivarin a Antiochie di Pisidie e, jentrâts te sinagoghe in di di sabide, si sentarin.

Une vore di Judeus e di convertîts, plens di timôr di Diu, i lerin daûrji a Pauli e a Barnabe, che cui lôr discors ju persuadevin a restâ salts te grazie di Diu.

La sabide dopo, dibot dute la citât si ingrumà par scoltâ la peraule di Diu. Cuan che a vioderinchel stragjo di int, i Judeus, ingjelosîts al ultin fin, a tacarin a contindi cun Pauli, blestemaçant. Alore Pauli e Barnabe ur diserin fûr dai dincj: «O vevis dut dirit che us fos contade a vualtris par prins la peraule di Diu, ma za che le rifudais e che no si indegnais di vê la vite eterne, nô o lin dai paians, parcè che il Signôr nus à ordenât cussì:

“Jo ti ài metût tant che une lûs pai popui,

par che tu puartis la salvece

fintremai ai ultins confins dal mont”».

Contentons di chestis peraulis, i paians si meterin a laudâ la peraule di Diu e ducj chei che a jerin destinâts a la vite eterne a vierzerin il cûr a la fede. Cussì la peraule di Diu e cjapave pît in dute la regjon. Ma i Judeus a stiçarin lis feminis plui religjosis e plui sioris e i grancj de citât e a inviarin une persecuzion cuintri Pauli e Barnabe e ju pararin fûr dai lôr confins. Alore lôr, spacantjur ancje il pulvin dai pîts, si meterin in strade par Iconi. Rivuart ai dissepui, a jerin incolms di gjonde e di Spirtu Sant.

Peraule di Diu.

SALM RESPONSORIÂL dal Salm 99

R. Nô o sin il so popul, il trop che lui al passone.

O ben:

R. Aleluia, aleluia, aleluia.

Berlait al Signôr di dute la tiere,
servît il Signôr cun ligrie,
presentaitsi denant di lui plens di gjonde. **R.**

Ricognossêt che il Signôr dome lui al è Diu;
lui nus à fats e nô o sin la sô vore,
so popul e trop che lui al passone. **R.**

Parcè che bon al è il Signôr
e il so boncûr al è par simpri;
la sô fedeltât e va di ete in ete. **R.**

SECONDE LETURE Ap 7,9.14-17

L'Agnel al sarà il lôr pastôr e ju menarà a lis risultivis de aghe de vite.

Dal libri de Apocalîs di san Zuan apuestul

Jo, Zuan, o viodei un stragjo di int, tante che nissun nol rivave a contâle, di ogni gjernazie e tribù e popul e lenghe. A stavin ducj in pîts denant de sente e denant dal Agnel, vistûts a blanc e cu lis palmis tes mans.

E un dai viei al disè: «A son chei che a son passâts pe grande tribulazion e a àn lavâts e fats diventâ cjandits i lôr vistûts cul sanc dal Agnel. Par chel a stan denant de sente di Diu e lu servissin dî e gnot tal so santuari; e chel che al è sentât su la sente al slargjarà la sô tende parsore di lôr.

No varan altri fan,

no varan altri sêt,

no ju ofindarà il soreli

ni arsetât di sorte,

parcè che l'Agnel che al sta tal mieç de sente

al sarà il lôr pastôr

e ju menarà a lis risultivis de aghe de vite.

E Diu al suiarà ogni lagrime dai lôr vôi».

Peraule di Diu.

CJANT AL VANZELI Zn 10,14

R. Aleluia, aleluia.

Jo o soi il bon pastôr, al dîs il Signôr;

o cognòs lis mês pioris e lis mês pioris mi cognossin me.

R. Aleluia.

VANZELI Zn 10,27-30

A lis mês pioris jo ur doi la vite eterne.

Dal vanzeli seont Zuan

In chê volte, Jesù al disè: «Lis mês pioris a scoltin la mê vôs e jo lis cognòs e lôr mi vegnin daûr. E jo ur doi la vite eterne e no si pierdaran par mai; e nissun no mes gjararà di man. Gno Pari, che mes à dadis, al è il plui grant di ducj e nissun nol pò gjavâlis de man dal Pari. Jo e il Pari o sin dutun».

Peraule dal Signôr.

Si dîs O crôt.

Su lis ufiertis

Danus la gracie, Signôr,

di indalegrâsi simpri cun chescj misteris di Pasche

in mût che ce che tu operis cence padin pe nestre salvece

nus fasi vê la gionde eterne.

Par Crist nestri Signôr.

Antifone a la comunion

Al è resurît il bon Pastôr che al à rimetude la sô vite pes sôs pioris
e pal so trop si è indegnât di murî, aleluia.

Daspò de comunion

Signôr, bon Pastôr, cjale cun voli di afiet il trop dai tiei fedêi
e indegniti di compagnâ tai passons de eternitât

lis pioris sfrancjadis cul sanc tant preseât di to Fi.
Par Crist nestri Signôr.

Si pues doprâ la formule de benedizion solene, p.